

## **SESSIONI URDINARIA DI U 2018**

### **RIUNIONI DI U 4 DI LUDDU**

**N° 2018 / 01**

**QUISTIONI URALI DIPUSITATA DA Don Joseph Luccioni  
À nomu di u gruppu « Custruimu l'avvene »  
À l'attinzioni di u Presidenti di l'Assemblea di a Ghjuventù è di l'Assemblea di  
Corsica**

### **Ughjettu : Prisenza di a Bandera nantu à a facciata di u Palazzu Lantivy**

O Sgiò Presidenti di l'Assemblea di a Ghjuventù è di l'Assemblea di Corsica,

U primu di ghjinnaghju scorsu nascia a nova Cullittività di Corsica, fruttu di a fusioni di i dui anziani Cunsiglii dipartimentali di Pumonti è di Cismonti è di l'anziana Cullittività tarritoriali di Corsica.

À l'ora di a custruzioni di issa nova istituzioni, arnesi impurtanti è nicissariu à i nosci ochji da raziunalizà l'azzioni publica, cuncipì è metta in baddu pulitichi più efficienti à u serviziu di l'intaressu generali di u nosciu populu è di u nosciu paesi, i tematichi mintuvati vani da punti amministrativi tecnici à sughjetti più pratici.

Frà quiddi, a Cullittività di Corsica hà ricuparatu u patrimoni immubiliari di i trè anziani cullittività. Tandù, i lucali di l'anzianu Cunsigliu dipartimentali di Pumonti sò avà pruprietà di a Cullittività unita. Vogliu di par quì, i scagni ma dinò a sala di deliberazioni, induva d'altrondi, s'hè riunitu u CESEC ma dinò locu di riunioni di a cummissioni permanenti di l'Assemblea di Corsica di a quali seti u presidenti.

Issu bastimentu, chì ghjova à volta di prifittura è di sediu d'urgani di a Cullittività di Corsica, ùn presenta nè a noscia bandera nè a bandera di l'Unioni aurupea.

Rispettu à u fattu chì issi dui banderi sò presentati nantu à a facciata di u sediu di l'Assemblea di Corsica, di l'Assemblea di a Ghjuventù, di u Cunsigliu Esecutivu è certi volti di u CESEC è di l'insema d'una parti impurtanti di servizii è direzzioni di a Cullittività di Corsica, è rispettu à u fattu ch'eddi custituiscini l'auturità corsi, è in ciò chì cuncerna l'Assemblea di Corsica, a cammara raprisintativa di u nosciu populu, u Cunsigliu Esecutivu sendu u so governu, ùn c'hè raghjoni chì a bandera fussi assenti di u Palazzu Lantivy.

S'è i so urighjini facini dibattitu in a cumunità di i storichi postu chì ùn sò sicuri, a bandera hà bè un passatu è una rialità pulitica è amministrativa. Aduprata com'è simbulu ufficiali di a Ripublica corsa pà a Cunsulta in u 1762, stampata nantu à i pezzi di muneta à a stessa epica, fù tralasciata sottu à a Francia è cascò in u smintecu sin'à l'anni sittanta, alba di u riacquistu culturali è di u rinnovu di a lotta muderna di u nosciu populu. S'è ufficialmenti, fù riabilitata com'è bandera ditta « righjunali » in u 1980, a testa mora custituisce par noi altri, è pà a maghjurità di i Corsi, un simbulu naziunali d'impurtanza maiò.

O sgiò Presidenti, vuliamu sapè in dui paroddi u vosciu avisu nantu à issu puntu, parchi a bandera ùn hè presentu è s'eddu hè statu evucatu dighjà, o s'edda hè privista di trattà issa dumanda inde l'avvena.

À ringrazià vi.